



Broj: 01-50-1-15-85/05
Sarajevo, 18. septembra 2006.

ZAPISNIK

85. sjednice Predstavničkog doma
Parlamentarne skupštine Bosne i Hercegovine,
održane 18. septembra 2006.

85. sjednica počela je u 10,50 sati. Prisustvovalo je 38 poslanika. Opravdano su odsustvovali: Jozo Križanović, Ljiljana Milićević, Nijaz Duraković i Ibrahim Đedović.

Iz Vijeća ministara BiH dijelu sjednice prisustvovao je ministar Safet Halilović.
Iz međunarodnih organizacija sjednicu su pratili predstavnici OHR-a i OSCE-a.

U uvodnim napomenama predsjedavajući Doma Martin Raguž upoznao je poslanike o tačkama kojima je dopunjen prijedlog dnevnog reda.

U raspravi prijedloge za dopunu dnevnog reda iznijeli su:

Šefik Džaferović – da se po članu 105. Poslovnika uvrsti Prijedlog zakona o izmjenama i dopunama Zakona o Vijeću ministara BiH – koji se odnosi na formiranje ureda koordinatora za Brčko.

Mirsad Ćeman predložio je da se u dnevni red uvrsti Prijedlog zakona o prekršajima, s obzirom da je nadležna komisija dostavila izvještaj.

Tihomir Gligorić zatražio je da se u dnevni red uvrsti Prijedlog zakona o izmjenama i dopunama Zakona o izmirenju obaveza po osnovu računa stare devizne štednje u drugom čitanju.

Elmir Jahić predložio je da se u dnevni red uvrsti imenovanje generalnog revizora i njegovih zamjenika, naglasivši da je Komisija izvršila bodovanje i da je veoma važno ovaj posao završiti s obzirom da će se izgubiti određeno vrijeme do konstitiranja novog saziva Doma.

Mladen Potočnik predložio je da se u dnevni red uvrsti prijedlog zaključka u vezi s izlaskom Bosne i Hercegovine na more.

Miloš Jovanović je, u ime Komisije za saobraćaj i komunikacije, predložio da se u dnevni red uvrsti Prijedlog zakona o izmjenama i dopunama Zakona o osnovama sigurnosti saobraćaja na putevima u BiH, naglasivši da je Komisija na jutrošnjoj sjednici jednoglasno usvojila Prijedlog ovog zakona i da nije bilo amandmana.

Mirsad Sipović predložio je uvrštavanje prijedloga zaključaka kojim će se odrediti sazivanje još jedne sjednice i Predstavničkog i Doma naroda, na kojima bi se, po hitnom postupku, razmatrali i usvojili: Zakon o sportu BiH, Zakon o advokaturi i Zakon o visokom obrazovanju, te da se zauzme stav da se provede javna rasprava o budućoj strategiji stabilnog, kvalitetnijeg i efikasnijeg finansiranja pravosuđa BiH na svim nivoima, kao i o potrebi dodatnog angažiranja i još aktivnijeg lobiranja od strane nadležnih institucija BiH, da se i prije Samita NATO-a u Rigi, u novembru, razmatra mogućnost što hitnijeg ulaska BiH u Partnerstvo za mir i NATO.

Zlatko Lagumdžija predložio je da se u dnevni red uvrste dvije tačke: prva - izvještaj ministra vanjskih poslova u vezi sa zaključivanjem sporazuma o paralelnim specijalnim vezama između Republike Srpske i Srbije, i druga - izvještaj Tužilaštva BiH o sporazumu o saradnji s tužilaštvima susjednih zemalja i međunarodnih institucija u vezi s procesuiranjem ratnih zločina.

Sead Avdić predložio je da se u dnevni red uvrsti prijedlog zaključka u vezi s decertificiranim policajcima.

Izet Hadžić predložio je da se u dnevni red uvrsti Izvještaj Istražne komisije za utvrđivanje devizne štednje građana BiH, položene na račune banaka do 31.12.1991.

Beriz Belkić predložio je uvrštavanje u dnevni red Prijedloga zakona o izmjeni i dopuni Zakona o koncesijama (predlagač: poslanik Momčilo Novaković), Prijedloga zakona o visokom obrazovanju (predlagač: Vijeće ministara BiH) i Prijedloga zakona o radijacijskoj i nuklearnoj sigurnosti (predlagač: Vijeće ministara BiH), jer su za ove zakonske prijedloge dostavljeni izvještaji nadležnih komisija.

Azra Hadžiahmetović izrazila je sumnju da Parlament treba davati saglasnost za ratifikaciju projektnog ugovora, te da je zato čudi da je na dnevnom redu Projektni ugovor o upravljanju zračnim saobraćajem. Zatražila je da se ovaj projektni ugovor skine s dnevnog reda.

U raspravi povodom prijedloga dnevnog reda učestvovali su Milorad Živković i Momčilo Novaković.

Poslije rasprave, predsjedavajući je proveo glasanje o svim prijedlozima za dopunu dnevnog reda.

Usvojeni su prijedlozi: Tihomira Gligorića, Miloša Jovanovića, Mirsada Sipovića, Mladena Potočnika, Seada Avdića, Izeta Hadžića i Beriza Belkića - za Prijedlog zakona o radijacijskoj i nuklearnoj sigurnosti.

Nisu usvojeni prijedlozi: Šefika Džaferovića, Mirsada Ćemana, Zlatka Lagumdžije i Beriza Belkića – za prijedloge zakona o visokom obrazovanju i koncesijama.

Azra Hadžiahmetović odustala je od prijedloga da se s dnevnog reda skine pomenuti Projektni ugovor, nakon sugestija iz rasprave da se tome zauzme stav prilikom rasprave o toj tački.

Poslije kratke pauze radi sačinjavanja novog prijedloga dnevnog reda, predsjedavajući Raguž konstatirao je da je za 85. sjednicu Predstavničkog doma usvojen sljedeći

D N E V N I R E D

1. Usvajanje Zapisnika 84. sjednice Predstavničkog doma;
2. Zahtjev Vijeća ministara BiH za razmatranje Prijedloga zakona o izmjenama i dopunama Zakona o Vijeću ministara BiH po hitnom postupku, u skladu s članom 105. Poslovnika (Zakon broj: 01,02-02-9-35,3/06., od 15.9.2006.),
3. Zahtjev poslanika: Martina Raguža, Šefika Džaferovića i Nikole Špirića za razmatranje Prijedloga izmjena i dopuna Poslovnika Predstavničkog doma Parlamentarne skupštine BiH po hitnom postupku, u skladu s članom 105. Poslovnika,
4. Zahtjev Vijeća ministara BiH za razmatranje Prijedloga zakona o dopuni Zakona o nadzoru nad tržištem u Bosni i Hercegovini po hitnom postupku, u skladu s članom 104. Poslovnika;
5. Prijedlog zakona o lijekovima i medicinskim sredstvima u Bosni i Hercegovini (drugo čitanje);
6. Prijedlog zakona o izmjenama i dopunama Zakona o izmirenju obaveza po osnovu računa stare devizne štednje – drugo čitanje (predlagač: poslanik Tihomir Gligorić),
7. Prijedlog zakona o izmjenama i dopunama Zakona o Vijeću ministara BiH (prvo čitanje);
8. Prijedlog zakona o izmjenama i dopunama Zakona o carinskoj tarifi BiH - predlagač: Vijeće ministara BiH (prvo čitanje);
9. Prijedlog zakona o izmjenama i dopunama Zakona o carinskoj tarifi BiH - predlagač: poslanik Nikola Špirić (prvo čitanje);
10. Prijedlog zakona o izmjenama i dopunama Zakona o carinskoj tarifi BiH - predlagač: poslanik Ruža Sopta (prvo čitanje);
11. Prijedlog zakona o elektronskom potpisu (prvo čitanje);
12. Prijedlog zakona o radijacijskoj i nuklearnoj sigurnosti u BiH (prvo čitanje),
13. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH (predlagač: Vijeće ministara BiH),

14. Specijalni izvještaj Ombudsmena za ljudska prava u BiH u vezi sa žalbama koje se odnose na dužinu sudskih postupaka;
15. Izvještaj o radu Komisije za finansije i budžet za mandatni period 2002.-2006.;
16. Izvještaj o radu Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine za mandatni period 2002.-2006.;
17. Izvještaj Istražne komisije za utvrđivanje devizne štednje građana Bosne i Hercegovine, položene na račune banaka do 31.12.1991.,
18. Imenovanje generalnog revizora i zamjenika generalnog revizora Bosne i Hercegovine,
19. Davanje saglasnosti za ratifikaciju:
 - a) Projektnog ugovora (Projekat upravljanja zračnim saobraćajem) između Ministarstva komunikacija i prometa BiH – Direkcija za civilno zrakoplovstvo BiH i Evropske banke za obnovu i razvoj,
 - b) Ugovora između Bosne i Hercegovine i Evropske banke za obnovu i razvoj – Projekat upravljanja zračnim saobraćajem,
 - c) Ugovora između Vijeća ministara BiH i Vlade Republike Italije o prihvatu lica čiji je boravak nezakonit,
20. Prijedlog zaključka u vezi s izlaskom BiH na more - predlagač: poslanik Mladen Potočnik,
21. Prijedlog zaključka u vezi s decertificiranim policajcima - predlagač poslanik Sead Avdić,
22. Prijedlog zaključaka – predlagač: poslanik Mirsad Sipović.

Ad – 1: Usvajanje Zapisnika 84. sjednice Predstavničkog doma

Mirsad Sipović prigovorio je da u Zapisniku nije tačno naveden rezultat glasanja o Rezoluciji koju je on predložio, rekavši da je za Rezoluciju glasao 31, a suzdržao se jedan poslanik, a ne 25 i jedan suzdržan, kako je navedeno u Zapisniku.¹

Predsjedavajući je na glasanje dao Zapisnik, s primjedbom poslanika Sipovića. Zapisnik je usvojen sa 26 glasova za i jednim protiv.

Ad – 2: Zahtjev Vijeća ministara BiH za razmatranje Prijedloga zakona o izmjenama i dopunama Zakona o Vijeću ministara BiH po hitnom postupku, u skladu s članom 105. Poslovnika (Zakon broj: 01,02-02-9-35,3/06., od 15.9.2006.)

Nije bilo rasprave.

S 30 glasova za i tri protiv usvojen je zahtjev za hitni postupak, a zatim je usvojen i Zakon o izmjenama i dopunama Zakona o Vijeću ministara BiH – za Zakon je glasalo 30, protiv 4 poslanika.

Ad – 3: Zahtjev poslanika Martina Raguža, Šefika Džaferovića i Nikole Špirića za razmatranje Prijedloga izmjena i dopuna Poslovnika Predstavničkog doma Parlamentarne skupštine BiH po hitnom postupku, u skladu s članom 105. Poslovnika

Nije bilo rasprave ni o ovoj tački dnevnog reda.

Po hitnom postupku jednoglasno su usvojene izmjene i dopune Poslovnika Predstavničkog doma.

¹ Uvidom u transkript sjednice i listing glasanja, utvrđeno je da je u Zapisniku tačno naveden rezultat glasanja o Rezoluciji, pa je, prema tome, primjedba poslanika Sipovića neosnovana.

Ad – 4: Zahtjev Vijeća ministara BiH za razmatranje Prijedloga zakona o dopuni Zakona o nadzoru nad tržištem u Bosni i Hercegovini po hitnom postupku, u skladu s članom 104. Poslovnika

Bez rasprave, s 32 glasa za i jednim protiv, usvojen je zahtjev Vijeća ministara BiH za proceduru po članu 104. za Prijedlog zakona o dopuni Zakona o nadzoru nad tržištem u Bosni i Hercegovini.

Ad – 5: Prijedlog zakona o lijekovima i medicinskim sredstvima u Bosni i Hercegovini (drugo čitanje)

U uvodnim napomenama predsjedavajući Raguž podsjetio je da su amandmane u plenarnoj fazi podnijeli: Nikola Špirić, Jozo Križanović – po dva amandmana, Beriz Belkić – tri amandmana, Mirsad Ćeman - dva amandmana koje ponovo brani i jedan amandman na amandman br. 5. Komisije.

U raspravi su učestvovali: Beriz Belkić, Nadžida Mlačo, Muhamed Altić, Mirsad Ćeman, Elmir Jahić, Milorad Živković i Momčilo Novaković.

Nakon rasprave, Nikola Špirić rekao je da je on u plenarnoj fazi podnio dva amandmana, ali da je spreman od njih odustati s ciljem donošenja zakona, pa je zamolio i druge poslanike da urade isto. U tom smislu zamolio je da se ne otvara rasprava o amandmanima, jer ako neki amandmani budu usvojeni, može se izmijeniti stav poslanika o samom zakonu.

Beriz Belkić odgovorio je, uz ostalo, da je i on dao određeni doprinos pristajući danas na određeni kompromis i podnoseći modificirane amandmane. Naglasio je da Klub Stranke za BiH, bez prihvatanja ovih amandmana, neće podržati zakon.

Selim Bešlagić obavijestio je da Klub SDP-a traži da se Dom izjasni o amandmanima Jozе Križanovića.

Elmir Jahić naglasio je da je Prijedlog zakona o lijekovima loš i da ga Klub SDA neće podržati ako se ne usvoje njihovi amandmani, kao i amandmani poslanika Ćemana, Belkića i Križanovića.

Milorad Živković rekao je da je veoma bitno da se donese Zakon o lijekovima pa je sugerirao da se o tome dobro razmisli prije izjašnjavanja o amandmanima. Zatim je, u ime Kluba SNSD-a, zatražio pauzu kako bi se vidjelo da li Prijedlog zakona može dobiti podršku.

Usljedila je pauza.

Poslije pauze, predsjedavajući je proveo glasanje o amandmanima koji su ostali u proceduri, a to su:

- dva amandmana Jozе Križanovića,
- amandman I. i III. Mirsada Ćemana,
- amandman II. i III. Beriza Belkića i
- jedan amandman Kluba SDA.

Poslije glasanja, predsjedavajući je konstatirao da je usvojen samo Amandman II. Beriza Belkića na član 65. Prijedloga zakona. Zatim je na glasanje dao Prijedlog zakona u cjelini – s amandmanima Komisije i amandmanom usvojenim na sjednici.

Za Prijedlog zakona glasalo je 15, protiv 19, suzdržao se jedan poslanik.

Predsjedavajući Raguž konstatirao je da Prijedlog zakona o lijekovima i medicinskim sredstvima nije usvojen u drugom čitanju.

Ad – 6: Prijedlog zakona o izmjenama i dopunama Zakona o izmirenju obaveza po osnovu računa stare devizne štednje – drugo čitanje (predlagač: poslanik Tihomir Gligorić)

U svojstvu predlagača kratko je govorio Tihomir Gligorić.

Zamjenik ministra finansija i trezora BiH Jusuf Kumalić govorio je u ime Vijeća ministara BiH. Naglasio je da su predložene izmjene predmetnog zakona neodržive jer bi, ako se usvoje, ugrozile makroekonomsku stabilnost države. To bi malo posljedice na kreditni rejting, bio bi

ugrožen valutni aranžman, ne bi mogla opstati fiskalna održivost i pogoršao bi se odnos s međunarodnim institucijama, rekao je, uz ostalo, Jusuf Kumalić.

U raspravi su učestvovali: Nikola Špirić, Jusuf Kumalić, Vinko Zorić i Mirsad Sipović.

Poslije rasprave provedeno je glasanje.

Za Prijedlog zakona glasalo je 16, protiv 11, suzdržalo se sedam poslanika. Iz Federacije BiH za je glasalo devet, iz Republike Srpske sedam poslanika.

Odmah je provedeno usaglašavanje u Kolegiju i nije bilo saglasnosti.

U drugom krugu glasanja iz Federacije BiH protiv je glasalo 11 poslanika, što je manje od dvije trećine iz entiteta.

Predsjedavajući je konstatirao da je Prijedlog zakona usvojen.

Ad – 7: Prijedlog zakona o izmjenama i dopunama Zakona o Vijeću ministara BiH
(prvo čitanje)

U raspravi u okviru ove tačke učestvovali su Momčilo Novaković i Mirsad Ćeman.

Poslije rasprave, Prijedlog zakona usvojen je i u prvom i u drugom čitanju. Za Prijedlog zakona glasalo je 29 poslanika, a jedan je bio protiv.

Ad – 8: Prijedlog zakona o izmjenama i dopunama Zakona o carinskoj tarifi BiH
– predlagač: Vijeće ministara BiH (prvo čitanje)

Dušanka Majkić i Momčilo Novaković diskutirali su povodom ovog prijedloga zakona, a zatim je provedeno glasanje u prvom čitanju.

Za je glasalo 19 (Federacija BiH 15, RS 4), protiv devet, suzdržao se jedan poslanik.

Nije bilo entitetske većine, pa je trebalo provesti usaglašavanje u Kolegiju kao komisiji. Međutim, bio je odsutan Nikola Špirić, pa se nije moglo provesti usaglašavanje. U kasnijem toku sjednice, kako su usvojena naredna dva zakona o izmjenama Zakona o carinskoj tarifi BiH, čiji su predlagači bili poslanici, Šefik Džaferović zatražio je da se o ovom prijedlogu zakona ponovo raspravlja i odlučuje, rekavši, uz ostalo, da je nelogično da se ne usvoji ovaj zakonski prijedlog koji je Vijeće ministara BiH predložilo realizirajući ranije doneseni zaključak Predstavničkog doma.

U ponovnom glasanju o Prijedlogu zakona u prvom čitanju – za su glasala 23 poslanika (Federacija BiH 17, RS 6), a protiv je glasao jedan. Usvojen je zatim i prijedlog za drugo čitanje, kao i Zakon o izmjenama i dopunama Zakona o carinskoj tarifi BiH. U drugom čitanju Zakon je usvojen s 23 glasa za (Federacija BiH 18, RS 5), a protiv su glasala dva poslanika.

Ad – 9: Prijedlog zakona o izmjenama i dopunama Zakona o carinskoj tarifi BiH
– predlagač: poslanik Nikola Špirić (prvo čitanje)

Nije bilo rasprave o ovoj tački dnevnog reda.

Prijedlog ovog zakona također je razmatran i usvojen i u prvom i u drugom čitanju. Za Zakon su glasala 24 (Federacija BiH 17, RS 7), protiv su glasala četiri, suzdržala su se tri poslanika.

Ad – 10: Prijedlog zakona o izmjenama i dopunama Zakona o carinskoj tarifi BiH
- predlagač: poslanik Ruža Sopta (prvo čitanje)

Također nije bilo rasprave ni o ovoj tački dnevnog reda.

I u prvom i u drugom čitanju razmatran je i usvojen Prijedlog ovog zakona o izmjenama i dopunama Zakona o carinskoj tarifi BiH. Za Zakon je glasalo 25, protiv tri, suzdržao se jedan poslanik.

Ad – 11: Prijedlog zakona o elektronskom potpisu (prvo čitanje)

I ovaj prijedlog zakona usvojen je bez rasprave i u prvom i u drugom čitanju. Za Zakon je glasalo 25 poslanika, a protiv su glasala tri.

Ad – 12: Prijedlog zakona o radijacijskoj i nuklearnoj sigurnosti u BiH (prvo čitanje)

Prijedlog zakona usvojen je u prvom čitanju bez rasprave i jednoglasno. Zatim je usvojen prijedlog da se pređe u drugo čitanje.

Predsjedavajući je podsjetio da je Milorad Živković podnio osam amandmana koje ponovo brani u plenarnoj fazi.

Nije bilo rasprave, pa je predsjedavajući proveo glasanje o amandmanima.

Amandman I. Milorada Živkovića nije dobio entitetsku većinu. Zbog odsustva jednog člana Kolegija Nikole Špirića, nije se moglo obaviti usaglašavanje, pa je predsjedavajući predložio da se ne glasa o ostalim amandmanima.

Ad – 13: Prijedlog zakona o izmjenama i dopunama Zakona o osnovama sigurnosti saobraćaja na putevima u BiH (predlagač: Vijeće ministara BiH)

Prijedlog zakona o izmjenama i dopunama Zakona o osnovama sigurnosti saobraćaja na putevima u BiH razmatran je i usvojen i u prvom i u drugom čitanju. Zakon je u drugom čitanju usvojen sa 27 glasova za i jednim protiv.

Ad – 14: Specijalni izvještaj Ombudsmena za ljudska prava u Bosni i Hercegovini u vezi sa žalbama koje se odnose na dužinu sudskih postupaka

Povodom ovog izvještaja diskutirali su: Mirsad Sipović, Mirsad Ćeman i Muhamed Moranjić. Zatim je Specijalni izvještaj jednoglasno usvojen.

Ad – 15 i 16:

Dom je bez rasprave i jednoglasno (prisutno 26 poslanika) usvojio:

- Izvještaj o radu Komisije za finansije i budžet za mandatni period 2002.-2006. i
- Izvještaj o radu Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine za mandatni period 2002.-2006.

Ad – 17: Izvještaj Istražne komisije za utvrđivanje devizne štednje građana Bosne i Hercegovine, položene na račune banaka do 31.12.1991.

U ime Istražne komisije govorio je Izet Hadžić.

U raspravi su učestvovali: Mirsad Sipović, Selim Bešlić, Mirsad Ćeman, Izet Hadžić, Fatima Leho, Momčilo Novaković i Marija Perkanović.

Prilikom glasanja Izvještaj nije dobio entitetsku većinu. Za je glasalo 16 (Federacija BiH 14, RS 2), protiv pet, suzdržalo se sedam poslanika.

Predsjedavajući je konstatirao da Izvještaj ostaje u proceduri za naredni saziv.

Ad – 18: Imenovanje generalnog revizora i zamjenika generalnog revizora Bosne i Hercegovine

Predsjedavajući Raguž podsjetio je na odredbe Zakona o reviziji institucija koje se tiču imenovanja generalnog revizora i zamjenika i pročitao listu kandidata koju je pripremila Komisija. Zatim je iznio svoje mišljenje da smatra da bi mjesto generalnog revizora trebalo pripasti hrvatskom narodu, te da bi zato trebalo postići politički dogovor, pa je zatražio da se Dom o tome izjasni.

Momčilo Novaković predložio je da se generalni revizor bira po broju bodova koje je dobio u Komisiji, te rekao da je kandidat iz srpskog naroda dobio najveći broj bodova i da se treba birati za generalnog revizora.

U raspravi su dalje učestvovali: Mladen Potočnik, Elmir Jahić, Ruža Sopta, Dušanka Majkić, Vinko Zorić i Martin Raguž.

Imajući u vidu da su u raspravi iznesena oprečna mišljenja, predsjedavajući je konstatirao da nema uslova da se danas izvrši imenovanje generalnog revizora i njegovih zamjenika, te da ovu tačku treba odgoditi.

Ad – 19: Davanje saglasnosti za ratifikaciju:

- a) Projektnog ugovora (Projekat upravljanja zračnim saobraćajem) između Ministarstva komunikacija i prometa BiH – Direkcija za civilno zrakoplovstvo BiH i Evropske banke za obnovu i razvoj,
- b) Ugovora između Bosne i Hercegovine i Evropske banke za obnovu i razvoj – Projekat upravljanja zračnim saobraćajem i
- c) Ugovora između Vijeća ministara BiH i Vlade Republike Italije o prihvatu lica čiji je boravak nezakonit.

Bez rasprave i jednoglasno data je saglasnost za ratifikaciju ugovora iz ove tačke.

Ad – 20: Prijedlog zaključka u vezi sa izlaskom Bosne i Hercegovine na more
– predlagač: poslanik Mladen Potočnik

Bez rasprave Dom je usvojio zaključak koji je predložio Mladen Potočnik, a koji glasi:

Predstavnički dom Parlamentarne skupštine BiH zahtijeva od Predsjedništva BiH i Vijeća ministara BiH osnivanje tima koji će pratiti sva događanja u vezi s aktivnostima susjednih zemalja koja su u direktnoj vezi s pokušajima blokiranja slobodnog izlaza Bosne i Hercegovine u svijet morskim putem.

Taj tim će pravovremeno, posredstvom Predsjedništva BiH i Vijeća ministara BiH, direktno sačuvati položaj Bosne i Hercegovine kao mediteransko-okeanske zemlje.

Rok za osnivanje tima je do 30. septembra 2006.godine.

Ad – 21: Prijedlog zaključka u vezi s decertificiranim policajcima, predlagač: poslanik Sead Avdić

Sead Avdić ukratko je obrazložio prijedlog zaključka i obavijestio Dom da je, na sugestiju Momčila Novakovića, izvršio određenu ispravku u tekstu, o čemu je upoznao poslanike. Zatim je jednoglasno usvojen zaključak sljedećeg sadržaja:

Predstavnički dom Parlamentarne skupštine BiH, imajući u vidu zaključke Komisije za ljudska prava, imigraciju, izbjeglice i azil, izražava svoju brigu i stav o potrebi nadležnih organa vlasti da prihvate decertificirane policajce u svojstvu suspendiranih radnika, s pravima koja proizilaze iz tog statusa, do završetka žalbe Vijeću sigurnosti Ujedinjenih naroda i eventualne revizije procesa decertifikacije.

Ad – 22: Prijedlog zaključka – predlagač: poslanik Mirsad Sipović

Mirsad Sipović govorio je kratko u svojstvu predlagača.

Prilikom glasanja prijedlog zaključka nije dobio entitetsku većinu, pa je predsjedavajući konstatirao da se ni o ovom ne može odlučivati bez prisustva trećeg člana Kolegija.

Ovim je završena 85. sjednica Predstavničkog doma.

Predsjedavajući je, na kraju, zahvalio svim poslanicima na četverogodišnjem sadržajnom i uspješnom radu.

Sjednica je završena u 17,05 sati.

Sastavni dio Zapisnika je transkript sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Martin Raguž